



## **PERUTUSAN**

### **HARI RAYA AIDILADHA 1440H**

**YAA DATO' DR. HJ. MOHD NA'IM BIN HJ. MOKHTAR  
KETUA PENGARAH/KETUA HAKIM SYARIE  
JABATAN KEHAKIMAN SYARIAH MALAYSIA**

Dengan nama Allah yang Maha Pemurah Lagi Maha Penyayang. Segala puji dan syukur ke hadrat Allah SWT, Tuhan sekalian alam yang mengizinkan kita mengecapi nikmat Iman dan Islam. Selawat dan salam ke atas junjungan mulia yang dikasihi, Nabi Muhammad SAW, ahli keluarga dan para sahabat Baginda sekalian.

Sempena Hari Raya Aidiladha kali ini, mari kita bersama-sama mengimbas kembali sejarah pengorbanan Nabi Ibrahim a.s dan anaknya Nabi Ismail a.s. yang sanggup mengorbankan harta dan jiwa demi keimanan kepada Allah SWT.

Ketaatan dan kepatuhan yang dipamerkan oleh Nabi Ibrahim a.s dan Nabi Ismail a.s adalah simbolik ketakwaan yang tertinggi oleh seorang hamba terhadap Pencipta Yang Esa.

Dengan mengambil semangat tersebut, saya berharap semua warga Jabatan Kehakiman Syariah Malaysia/ Jabatan Kehakiman Syariah Negeri-Negeri/ Mahkamah Syariah Negeri-Negeri sentiasa muhasabah diri, memperbaiki peribadi dan mempertingkatkan ketakwaan kepada Allah SWT dalam setiap perkara yang kita lakukan.

Saya juga menyeru agar kita semua turut mempunyai iltizam yang tinggi untuk sama-sama berkorban memberikan yang terbaik dalam setiap pekerjaan yang kita lakukan demi membangunkan organisasi ke arah yang lebih cemerlang dan gemilang selaras dengan hasrat YB Menteri di Jabatan Perdana Menteri yang inginkan Institusi Kehakiman Syariah Malaysia menjadi satu institusi yang unggul menjelang 2025.

Sesungguhnya, perjalanan kita di dunia ini umpama satu singgahsana sementara yang mana akhirat jua destinasi abadi. Semoga dengan sikap komited dan ikhlas kita dalam ibadah dan pekerjaan menjadi asbab untuk kita mengecapi nikmat indah di syurga, InsyAllah.

Ini bersesuaian dengan Firman Allah SWT dalam surah al An'am ayat 162-163 yang bermaksud, "Katakanlah, sesungguhnya solatku, sembelihanku (korbanku), hidupku, dan matiku hanyalah untuk Allah, Rabb semesta alam, tiada sekutu baginya; dan demikian itulah yang diperintahkan kepadaku dan aku adalah orang yang pertama-tama menyerahkan diri (kepada Allah)."

Akhir kata, saya ingin mengucapkan Selamat Menyambut Hari Raya Aidiladha 1440H kepada semua warga Jabatan Kehakiman Syariah Malaysia/ Jabatan Kehakiman Syariah Negeri-Negeri/ Mahkamah Syariah Negeri-Negeri dan selamat pulang ke kampung halaman bertemu dengan ibu ayah serta saudara mara tercinta.

Sekian, wabillahitaufik walhidayah wassalamualaikum wrt.